

CONVENIO DE COLABORACIÓN ENTRE A AXENCIA GALEGA DE INNOVACIÓN, O INSTITUTO GALEGO DE PROMOCIÓN ECONÓMICA, XESGALICIA SOCIEDAD GESTORA DE ENTIDADES DE INVERSIÓN DE TIPO CERRADO S.A.U., O CONSORCIO DA ZONA FRANCA DE VIGO E VIGO ACTIVO SOCIEDAD DE CAPITAL DE RIESGO DE RÉGIMEN SIMPLIFICADO SA; PARA O DESENVOLVEMENTO DA CUARTA EDICIÓN DO PROGRAMA VIAGALICIA.

Santiago de Compostela, 20 de xullo de 2016

REUNIDOS:

Dunha parte, D. FRANCISCO JOSÉ CONDE LÓPEZ, Conselleiro de Economía, Emprego e Industria da XUNTA DE GALICIA, nomeado para o devandito cargo polo Decreto 116/2015, do 4 de outubro (DOG nº190, do 5 de outubro), actuando no exercicio das atribucións conferidas polo artigo 34 da Lei 1/1983, do 22 de febreiro, de normas reguladoras da Xunta e da súa Presidencia e polo Decreto 175/2015, do 3 de decembro, polo que se establece a estrutura orgánica da Consellería de Economía, Emprego e Industria; Presidente da Axencia Galega de Innovación (en diante, GAIN), en virtude do disposto no artigo 12 do Decreto 50/2012, do 12 de xaneiro, polo que se crea a Axencia Galega de Innovación e se aproban os seus estatutos; Presidente do Instituto Galego de Promoción Económica (en diante, IGAPE), por razón do seu cargo e en virtude do disposto no artigo 11 da Lei 5/1992, do 10 de xuño, de creación do Instituto Galego de Promoción Económica; e Presidente do Consello de Administración de XESGALICIA, Sociedad Gestora de Entidades de Inversión de Tipo Cerrado, S.A.U. (en adelante, XESGALICIA), en virtude do disposto no artigo 18 dos seus estatutos.

Doutra parte, Dña. TERESA PEDROSA SILVA, Delegada Especial do Estado no CONSORCIO DA ZONA FRANCA DE VIGO (en adelante, o CONSORCIO), nomeada para o devandito cargo polo Real Decreto 372/2012, do 10 de febreiro; e Presidenta do Consello de Administración de VIGO ACTIVO SOCIEDAD DE CAPITAL RIESGO DE RÉGIMEN SIMPLIFICADO, S.A. (en adelante, VIGO ACTIVO), nomeada para o dito cargo con data do 29 de novembro de 2012, inscrito Rexistro Mercantil de Pontevedra e publicado na sección da provincia de Pontevedra do BORME número 236, de data do 11 de decembro de 2012.

As partes recoñécense capacidade legal e xurídica suficiente para formalizar o presente convenio e, a tal efecto,

EXPOÑEN:

Que GAIN é unha axencia pública autonómica adscrita á Consellería de Economía, Emprego e Industria, creada polo Decreto 50/2012, do 12 de xaneiro, ao amparo da autorización prevista na disposición adicional segunda da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, que, de acordo cos seus estatutos, ten como finalidade fomentar e vertebrar as políticas de innovación nas administracións públicas galegas e o apoio e impulso do crecemento e da competitividade das empresas galegas, a través da implementación de estratexias de innovación eficientes.

Para a consecución dos seus obxectivos, GAIN, de acordo co artigo 10 dos seus Estatutos, poderá colaborar con outras administracións públicas, no ámbito das súas respectivas competencias e funcións, e con entes do sector privado, a través dos correspondentes convenios de colaboración.

Dentro das unidades orgánicas nas que se estrutura GAIN, está a Área de Centros. Á dita Área compétenlle, entre outras tarefas, e a través do departamento de Programación de Centros, a xestión operativa e dinamización das infraestruturas tecnolóxicas e espazos produtivos de GAIN, en particular, a xestión do CIS Ferrol - Centro de Innovación e Servizos do Deseño e a Tecnoloxía, organismo público adscrito á Axencia, facilitador da transferencia de innovación e tecnoloxías ás Pemes e empresas de sectores clave de Galicia, para propiciar a súa transformación e a mellora do posicionamento das empresas.

Na execución de parte das actividades do presente convenio, contarase co devandito CIS Ferrol - Centro de Innovación e Servizos do Deseño e a Tecnoloxía.

Que IGAPE é a Axencia, adscrita a Consellería de Economía, Emprego e Industria, para o desenvolvemento económico de Galicia. A misión do IGAPE é a de apoiar todas as actividades que contribúan a mellorar o sistema produtivo galego, facilitando os procesos de creación, consolidación e crecemento empresarial.

Entre as empresas participadas polo IGAPE encóntrase XESGALICIA, empresa pública, que dende o ano 1999 financia o desenvolvemento empresarial mediante participacións temporais e minoritarias no capital social das empresas, outorgando, como complemento, préstamos participativos ou préstamos ordinarios a longo prazo a empresas participadas, realizándoo a través da xestión e administración de diferentes e específicos Fondos de Capital Risco.

Que o CONSORCIO, creado mediante o Decreto do 20 de xuño de 1947, é unha entidade de dereito público dependente do Ministerio de Hacienda cuxo obxecto, segundo figura no seu Estatuto Fundacional (aprobado por Orden do Ministerio de Hacienda do 24 de xullo de 1951, e modificado por Orden do 11 de maio de 1998) é, ademais da explotación da Zona Franca, a contribución ao desenvolvemento e dinamización económica e social da súa área de influencia, configúrase, na práctica, como unha axencia de desenvolvemento local.

Con este carácter, o CONSORCIO ven realizando actuacións de importante repercusión e transcendencia económica como, a modo de exemplo, a creación e promoción do chan empresarial, o impulso ao emprendemento e innovación ou a prestación de servizos de información a empresas a través do programa ARDÁN, servizo de información empresarial orientado ao público en xeral.

Que VIGO ACTIVO é unha empresa pública, participada polo Consorcio da Zona Franca de Vigo (83,83%), por Abanca Corporación Industrial y Empresarial, S.L. (16,05%), e pola Cámara de Comercio de Vigo (0,12%), que dende o ano 1993 apoia o crecemento de empresas, fundamentalmente, a través do financiamento de capital risco. Así, cun total de fondos desembolsados superior aos 16,3 millóns de euros, ten entre os seus obxectivos fundamentais:

1. A contribución ao desenvolvemento económico e social de Galicia mediante o apoio a empresarios e emprendedores.
2. O investimento en proxectos con altas expectativas de rendibilidade.
3. O favorecemento da cooperación entre empresas e a súa internacionalización.
4. O apoio ás negociacións con entidades financeiras e novos inversores.
5. O impulso á transformación, consolidación e profesionalización das empresas.

Que a Xunta de Galicia aposta pola innovación como vía para mellorar a calidade de vida dos cidadáns de Galicia, como panca de eficiencia e de calidade da xestión autonómica, e como polo de atracción de actividades de alto valor engadido.

Que o CONSORCIO, no seu carácter de axencia de desenvolvemento local, considera que o fomento ao emprendemento e innovación será un dos piares básicos sobre os que se cimentará o crecemento da economía galega.

Que a tal efecto, o CONSORCIO, no marco dos seus programas de apoio ao emprendemento e á innovación, creou VIAVIGO, como un programa cuxo obxectivo é a aceleración de proxectos innovadores e invertibles, aos que se acompaña na súa validación, posta en marcha, financiamento e maduración.

O devandito Programa configurouse como un *programa de alto rendemento* de ata 18 meses de duración, que combina, a supervisión dun equipo de expertos en emprendemento, formación, titorización e mentoring, cun espazo de traballo en coworking e coa achega de financiamento para arrancar os proxectos.

Que tras o éxito acadado pola primeira convocatoria, o CONSORCIO, VIGO ACTIVO, GAIN, IGAPE e XESGALICIA, asinan, con data do 17 de outubro de 2014 un convenio para o desenvolvemento da Segunda Edición, e, posteriormente, e de cara ao desenvolvemento dunha Terceira Edición, un novo convenio, con data 8 de outubro de 2015, que incluíu como novidade o establecemento dunha nova sede na provincia de Lugo, ampliando así o Programa ao resto da Comunidade autónoma, e facilitando o acceso ao mesmo.

O desdoblamento en dúas sedes permitiu facer mais fácil o acceso ao dito Programa e aumentou as posibilidades de abarcar un maior número de candidatos, redundando nunha maior operatividade na xestión do mesmo. Polo tanto, a finalidade última perseguida foi a de ampliar o Programa a todas as provincias galegas, baixo a marca global de VIAGALICIA.

Os citados convenios foron asinados para regular a colaboración e participación activa das partes no desenvolvemento do Programa, mediante actuacións, tales como, prestación de apoio á comunicación e difusión do Programa, participación no Comité técnico do mesmo con funcións de avaliación e selección de proxectos; así como mediante a achega de recursos económicos, tanto para a posta en funcionamento do citado Programa, como encamiñadas a

favorecer o desenvolvemento dos proxectos seleccionados segundo diversos criterios determinantes da acelerabilidade e investibilidade dos mesmos.

A devandita colaboración incluíu ademais, como obrigas do IGAPE e de XESGALICIA, o apoio na comunicación e difusión do programa, e a concesión de préstamos participativos reembolsables, a través do Fondo GIE, Galicia Iniciativas Emprendedoras FCR – Pyme, respectivamente.

Que, tendo en conta os antecedentes expostos, o CONSORCIO organiza unha Cuarta Edición do Programa VIAGALICIA, na que se prevé o mantemento da sede de Lugo, e da situada en Vigo; onde, en todo caso, se seguirá levando a cabo o desenvolvemento da Fase de Aceleradora.

Que, coma novidade na presente edición, os proxectos que incorporen tecnoloxías facilitadoras e de Fabrica 4.0, poderán realizar actividades nas distintas fases do programa no CIS Ferrol - Centro de Innovación e Servizos do Deseño e a Tecnoloxía

Ademais, dentro da colaboración que a Xunta de Galicia e o Consorcio da Zona Franca de Vigo están a realizar para o apoio e consolidación do sector Aeroespacial en Galicia, e tendo en conta o programa de impulso ao Emprendemento e I+D no sector tecnolóxico Aeroespacial, e o Edificio Tecnolóxico Aeroespacial de Porto do Molle, na presente edición haberá ata un máximo de 4 prazas adicionais na Fase de Aceleración destinadas a aqueles proxectos deste sector que superen con éxito a Fase de Academia e que sexan seleccionados segundo os criterios de elixibilidade e de selección nesta convocatoria.

Este Programa alíñase, tanto coas previsións recollidas na Lei 5/2013, de fomento da investigación e da innovación de Galicia, como coas prioridades contidas no Plan de Estratexia de Especialización Intelixente de Galicia (“RIS3”).

Que a Lei 5/2013, do 30 de maio, de fomento da investigación e da innovación de Galicia, dispón no seu artigo 2 que a mesma ten como obxectivo coordinar e potenciar os esforzos destinados a promover o coñecemento científico, contribuír eficazmente á consolidación da posición das empresas e institucións galegas no ámbito competitivo europeo e internacional, e posibilitar un cambio no modelo produtivo galego cara a outro centrado na innovación.

Que a Lei 9/2013, do 19 de decembro de 2013, do emprendemento e da competitividade económica en Galicia, ten por obxecto, de acordo co establecido no seu artigo 1, a definición dun marco normativo específico na Comunidade Autónoma de Galicia que incentive a creación e implantación de empresas e o seu posterior desenvolvemento, a través da xeración de cultura emprendedora, a formación, a flexibilización dos trámites administrativos, a ampliación dos prazos de validez dos permisos e a introdución de instrumentos financeiros, servizos específicos ás persoas emprendedoras e incentivos fiscais.

Que o 27 de decembro de 2012, a Xunta de Galicia e o Ministerio de Economía y Competitividad (MINECO), asinaron un convenio de colaboración para o desenvolvemento en Galicia da *Estratexia Española de Innovación* (DOG nº 26, do 6 de febreiro de 2013). Entre as actuacións susceptibles de desenvolverse con cargo ao convenio están as relativas a centros de excelencia e crecemento empresarial, impulsando a excelencia nos procesos de planificación estratéxica da innovación empresarial das PEMES galegas, e creando un foro onde compartir as boas prácticas na xestión da innovación na empresa.

De acordo cos antecedentes anteriormente indicados, e coas previsións contidas nas referencias normativas sinaladas, e tendo en conta o evidente beneficio que actividades como as desenvolvidas por este tipo de programas reportan ao conxunto da sociedade, GAIN, IGAPE, XESGALICIA, o CONSORCIO e VIGO ACTIVO; teñen interese en xuntar esforzos e por en común as súas sinerxías e experiencia en prol da potenciación de programas de innovación e emprendemento que, tendo éxito en edicións anteriores, constitúen un inestimable incentivo ao crecemento económico da Comunidade Autónoma de Galicia.

A colaboración das partes no desenvolvemento desta nova edición, plasma a efectiva realización dun interese público e fai que resulte xustificada a participación da administración na actividade prevista para acadar resultados comúns aos intereses das partes asinantes.

Con tal motivo, as partes consideran de especial interese a súa colaboración na xestión da Cuarta Edición do Programa VIAGALICIA e, a tal efecto, os aquí comparecentes subscriben o presente convenio de colaboración de acordo coas seguintes

CLÁUSULAS:

Primeira.- Obxecto.

O presente Convenio ten por obxecto sentar as bases de colaboración entre as partes para o desenvolvemento da 4ª Edición do Programa VIAGALICIA, unha iniciativa de aceleración de proxectos innovadores que conta co éxito do desenvolvemento precedente de tres edicións.

O Programa estrutúrase nas seguintes fases:

0. Inspiration Days.
1. Convocatoria (inscrición on line).
2. Start up day (sedes de Vigo e Lugo).
3. Academia (sedes de Vigo e Lugo).
4. Demo day (sedes de Vigo e Lugo).
5. Aceleradora (sede de Vigo).
6. Investors day (sede de Vigo), cuxa realización se estima que teña lugar no segundo semestre de 2017

Ao remate das mesmas, levarase a cabo unha etapa de seguimento consistente no acompañamento aos diferentes proxectos no seu proceso de maduración.

Segunda.- Descrición das actuacións e obrigas do CONSORCIO.

O CONSORCIO habilitará, novamente para esta cuarta edición do Programa, as dúas sedes ata a Fase de aceleración, situadas en Vigo e Lugo; non obstante, a Fase de aceleración e o Investors day realizarase de forma conxunta na sede de Vigo.

O Comité técnico do Programa reservarase o dereito de reorganizar as diferentes fases en función do número de candidaturas para cada sede.

O CONSORCIO por si mesmo ou a través de terceiros, coordinará a execución da cuarta edición do programa VIAGALICIA a través das seguintes actuacións:

Fase 0-Inspiration Days: Realización de Xornadas de presentación da Convocatoria e presentación de exemplos de Tecnoloxías facilitadoras e de Fabrica 4.0 en Nichos potenciais de Emprendemento. Esta fase estenderase ata o remate da Fase I: Convocatoria.

Fase I – Convocatoria: consiste no lanzamento dunha convocatoria pública de captación de proxectos de emprendedores para a súa participación en VIAGALICIA. De entre os proxectos presentados, e que haberán de inscribirse on line na plataforma habilitada a tal efecto, logo das correspondentes entrevistas (ata un máximo de 120 para ambas as dúas sedes), e tras a aplicación dos criterios definidos no anexo II do presente convenio, procederase á publicación da relación das candidaturas seleccionadas, sendo estas un máximo de 80, que se corresponderán cun máximo de 40 candidaturas seleccionadas para cada unha das sedes (Vigo e Lugo). Estes seleccionados serán os que participarán na seguinte fase.

Fase II - Startup Day: levarase a cabo en dúas sesións diferentes, unha por cada sede, e consistirá na organización de dúas xornadas nas que, tras a habilitación dos mecanismos oportunos, se permita avaliar as habilidades persoais dos participantes. Realizaranse probas e dinámicas de grupo, co obxectivo de avaliar, segundo os criterios recollidos no anexo II do presente convenio, tanto as habilidades persoais, como o grao de complementariedade e carácter multidisciplinar do equipo promotor do proxecto.

Desta fase saíran un máximo de 40 candidaturas, que se corresponderán cun máximo de 20 candidaturas por cada unha das sedes, que serán invitadas formalmente a pasar á seguinte fase.

Fase III - Academia: ao igual que a fase anterior, desenvolverase nas sedes de Vigo e Lugo. Os equipos seleccionados na fase anterior deberán incorporarse ao Programa de Capacitación da Academia.

O obxectivo desta fase é facilitar, as persoas que forman os 20 equipos de emprendedores (por cada sede) seleccionados na fase previa, os coñecementos, competencias e habilidades necesarias para definir o seu modelo de negocio, a través dun plan de formación teórico - práctico orientado a fortalecer e acelerar a aprendizaxe, integrado por diversas sesións e titorías.

Complementariamente, para aqueles proxectos con Tecnoloxías facilitadoras e de Fabrica 4.0 que resulten seleccionados, ata un máximo de 10, poderá realizarse o Programa de Capacitación Tecnolóxica 4.0. Este programa é diferente do *Programa de Capacitación da Academia*, e non inflúe na valoración final e na determinación de qué proxectos pasan á Fase de Aceleradora.

O Programa de Capacitación Tecnolóxica 4.0 consiste nunha formación-acción titorizada en tecnoloxías 4.0, impresión 3D e realidade virtual, que se realizará en laboratorios do CIS cunha duración aproximada de 24 horas presenciais, máis 20 horas complementarias. Unha vez coñecidos, analizados e seleccionados os proxectos afectados polas citadas tecnoloxías, deseñárase o devandito programa de formación, e de ser precisa algunha contratación adicional ao persoal do CIS, esta poderá ser contratada polo Consorcio sempre co asesoramento do persoal especializado do CIS e de GAIN. Este Programa de Capacitación Tecnolóxica 4.0 poderá desenvolverse despois da celebración do Demo Day.

Tras a aplicación dos criterios de elixibilidade e de selección previstos (anexo II), determinarase qué proxectos superaron satisfactoriamente o *Programa de Capacitación da Academia*, e que por tanto, están en situación de ser presentados ante un panel de inversores no Demo Day.

Fase IV: - Demo Day: desenvolvido en dúas sesións, unha por sede, procederase á presentación pública de cada un dos 20 proxectos (por cada sede) que finalizaron a Fase de Academia ante o Comité Técnico de VIAGALICIA, representantes das entidades colaboradoras do programa, medios de comunicación e resto de invitados.

Tras a valoración de cada proxecto presentado, segundo os criterios de elixibilidade e de selección previstos (Anexo II), seleccionaranse un máximo de 15 proxectos (sen incluír os do sector aeroespacial) e ata 4 proxectos adicionais provintes do programa de impulso ao Emprendemento e I+D no sector tecnolóxico Aeroespacial, aos que VIAGALICIA, ofertará formalmente: financiamento, mediante préstamo participativo e incorporación á Aceleradora.

GAIN comprométese a conceder aos proxectos seleccionados, as subvencións previstas na cláusula sétima do presente convenio, relativa ao financiamento.

Fase V - Aceleradora: desenvolverase unicamente na sede de Vigo. Os proxectos aprobados que aceptasen as propostas anteriores, e acreditado o cumprimento dos compromisos mencionados nas Bases; poderán incorporarse á Aceleradora, e obterán a cualificación de “Proxectos Innovadores e Invertibles”.

A incorporación á Aceleradora garante o acceso ao espazo de coworking que o CONSORCIO pon a disposición dos emprendedores.

Cunha duración de seis (6) meses, esta fase ten como obxectivo que os proxectos nos que se decidiu conceder un préstamo participativo sufran un proceso intenso de aceleración das súas actividades de cara a conseguir o financiamento externo necesario para a súa consolidación definitiva.

Para conseguir este obxectivo serán deseñadas unha serie de mesas redondas con emprendedores, sesións de networking, titorización e mentorización adaptadas ás características e necesidades específicas de cada proxecto.

Complementariamente, para aqueles proxectos con tecnoloxías 4.0, poderá realizarse un Programa de Aceleración Tecnolóxica 4.0 específico e adicional, consistente en:

- Asesoramento e Mentoring Tecnolóxico. Recibirase durante parte da fase de Aceleración de proxectos nos laboratorios do CIS Ferrol.
- Desenvolvemento de prototipos e xeración de pilotos para testear a validez das solucións deseñadas.
- Servizos tecnolóxicos para realizar probas, primeiras series, desenvolvemento e validación de prototipos, DEMOS físicos e virtuais.

Os proxectos con tecnoloxías 4.0 poderán realizar este Programa de Aceleración Tecnolóxica durante un máximo de 12 meses no CIS Ferrol, unha vez rematada a fase de aceleración.

A achega de GAIN terá a consideración de subvención en especie, no que se refire ao Programa de Aceleración Tecnolóxica 4.0

Fase VI - Investors Day: ao igual que a Fase Aceleradora, o Investors Day terá lugar unicamente na sede de Vigo, estimándose a súa celebración no segundo semestre de 2017. Os proxectos que superen satisfactoriamente a fase anterior poderán ser presentados a un panel de investidores institucionais e externos no Investors Day.

Á finalización das devanditas fases, comezará unha etapa de seguimento, consistente no acompañamento aos diferentes proxectos no seu proceso de maduración.

Ademais de coordinar a execución das devanditas fases, o CONSORCIO incorporará un acceso directo na páxina web de VIAGALICIA, ás páxinas web das institucións da Xunta de Galicia colaboradoras con este Programa.

Asemade, o CONSORCIO, deberá:

- I. Dar entrada no Comité Técnico de VIAGALICIA a GAIN e Xesgalicia.
- II. Difundir a participación de GAIN, do IGAPE e de XESGALICIA en cantos medios se promocióne o programa VIAGALICIA.
- III. Cumprir coas obrigas de publicidade e transparencia previstas na cláusula décimo segunda do presente convenio.

Terceira.-Obrigas de VIGO ACTIVO.

VIGO ACTIVO asume as seguintes obrigas:

- I. Previo cumprimento dos requisitos internos establecidos por VIGO ACTIVO, poderá conceder a cada un dos 15 proxectos seleccionados + ata 4 do sector Aeroespacial para incorporarse á Fase de Aceleración, previa a súa constitución en empresa, un préstamo participativo reembolsable, de ata un máximo previsto de 50.000 euros por proxecto.
- II. VIGO ACTIVO asume o compromiso de financiamento que se detalla na cláusula sétima do presente convenio.
- III. Participar no Comité Técnico de VIAGALICIA.
- IV. Cumprir coas obrigas de publicidade e transparencia previstas na cláusula décimo segunda do presente convenio.

Cuarta.-Obrigas de GAIN.

GAIN asume as seguintes obrigas:

- I. Facilitar ao CONSORCIO apoio na comunicación e difusión do programa a través dos seguintes medios:
 - a) Concedendo as autorizacións pertinentes e necesarias para que o CONSORCIO utilice o seu logo e o seu nome na publicidade e nos documentos, tanto físicos como virtuais, que se deseñen e editen relacionados co proxecto VIAGALICIA.
 - b) Incorporando un enlace de acceso directo dende a súa páxina web corporativa á páxina web da aceleradora de empresas VIAGALICIA, promovida polo CONSORCIO.

- c) Dando acceso aos emprendedores que participen en VIAGALICIA ás redes xestionadas por aquel organismo, tales como redes de mentores, inversores, etc.

II. Participar no Comité Técnico de VIAGALICIA.

III. Achegar os recursos necesarios para o desenvolvemento das actividades obxecto do presente convenio conforme ao previsto na cláusula sétima.

IV. Establecer un programa de incentivos á excelencia emprendedora que comprenderá:

- Achegas económicas en concepto de contribución ou compensación dos gastos incorridos polo CONSORCIO no desenvolvemento das diferentes fases do Programa.
- Achegas económicas en concepto de axudas destinadas ao desenvolvemento dos proxectos.

V. Habilitar o CIS Ferrol para a realización das actividades propostas para os proxectos relacionados con tecnoloxías 4.0. Os proxectos que incorporen tecnoloxías facilitadoras e de Fabrica 4.0, complementariamente ás axudas previstas, poderán realizar actividades nas distintas fases do programa no CIS Ferrol - Centro de Innovación e Servizos do Deseño e a Tecnoloxía, mediante o desenvolvemento dun Programa de Capacitación e Aceleración Tecnolóxica, que se encadra nas fases de Academia, para o relativo á Capacitación, e nas fase de Aceleradora, para o relativo á Aceleración Tecnolóxica. A de GAIN considérase subvención en especie no que se refire ao Programa de Aceleración Tecnolóxica 4.0

VI. Cumprir coas obrigas específicas en materia de información sobre convenios.

Quinta.-Obrigas do IGAPE.

O IGAPE asume a obriga de facilitar ao CONSORCIO o apoio na comunicación e difusión do Programa a través dos seguintes medios:

- a) Concedendo as autorizacións pertinentes e necesarias para que o CONSORCIO utilice o seu logo e o seu nome na publicidade e nos documentos, tanto físicos como virtuais, que se deseñen e editen relacionados co proxecto VIAGALICIA.
- b) Incorporando un enlace de acceso directo dende a súa páxina web corporativa á páxina web da aceleradora de empresas VIAGALICIA, promovida polo CONSORCIO.

- c) Dando acceso aos emprendedores que participen en VIAGALICIA ás redes xestionadas por aquel organismo, tales como redes de mentores, inversores, etc.

Así mesmo, terá o deber de cumprir coas obrigas de publicidade e transparencia previstas na cláusula décimo segunda do presente convenio.

Sexta.-Obrigas de XESGALICIA.

- I. Previo cumprimento dos requisitos establecidos no artigo 53 da Lei 12/2015, do 24 de decembro, de orzamentos xerais da Comunidade Autónoma de Galicia para o ano 2016, XESGALICIA (Sociedad Gestora de Entidades de Inversión de Tipo Cerrado, S.A.U.) poderá conceder a cada un dos 15 proxectos + ata 4 do sector Aeroespacial seleccionados para incorporarse á Fase de Aceleración, previa a súa constitución en empresa, un préstamo participativo reembolsable do Fondo GIE, Galicia Iniciativas Emprendedoras FCR – Pyme (como parte dun programa de incentivos á excelencia emprendedora). O devandito préstamo cubrirá a cantidade investida na posta en marcha do proxecto ata un máximo previsto de 50.000 euros por proxecto, e deberán cumprirse as condicións e requisitos que a tal efecto se establezan por XESGALICIA.
- II. Participar no Comité Técnico de VIAGALICIA.
- III. Cumprir coas obrigas de publicidade e transparencia previstas na cláusula décimo segunda do presente convenio.

Sétima.- Financiamento.

1. Financiamento do Consorcio.

O recollido nos cadros que se incorporan nos apartados 2.b) e 2.c) desta estipulación.

2. Financiamento de GAIN.

Ao abeiro do presente convenio prevense as seguintes achegas económicas por parte de GAIN:

2. a. Financiamento ao CONSORCIO.

En concepto de compensación de custes xerados pola posta en marcha, participación e desenvolvemento das diferentes fases do Programa VIAGALICIA.

2. b. Subvencións aos proxectos seleccionados.

Contémplase a obriga de outorgamento de subvencións directas a favor dos proxectos seleccionados ao abeiro do Programa.

2. c. Subvención en especie.

Así mesmo, o convenio contempla a achega conxunta por parte de GAIN e do CONSORCIO para o desenvolvemento do Programa de Capacitación e Aceleración Tecnolóxica 4.0

A achega terá para GAIN a consideración de subvención en especie, no que se refire ao Programa de Aceleración Tecnolóxica 4.0

2. a. Financiamento ao CONSORCIO.

Con relación ao **financiamento de GAIN ao CONSORCIO** en concepto de compensación de custes, deberá terse en conta que a posta en marcha e desenvolvemento do Programa VIAGALICIA, será cofinanciada por GAIN e o Consorcio, a razón dun 70% (GAIN) e dun 30% (Consortio), as ditas porcentaxes de cofinanciamento calcúlanse sobre a base impositible do custo estimado (335.000€). Os importes de GAIN deberán incrementarse co correspondente IVE.

Os gastos a compensar por GAIN serán os xerados con posterioridade á data de sinatura do presente convenio.

En todo caso, o financiamento de GAIN verase reducido proporcionalmente á diminución dos custos efectivamente soportados polo CONSORCIO, respectándose en todo momento as porcentaxes de participación, de xeito tal que o financiamento efectivo de GAIN será, como máximo, do 70%

2. b. Subvencións aos proxectos seleccionados.

Así mesmo, o convenio contempla o compromiso por parte de GAIN de concesión dunha subvención a favor duns beneficiarios non determinados ao momento da sinatura do convenio, pero si determinables ao longo do desenvolvemento do Programa VIAGALICIA, realizarase pois unha **achega económica a favor dos proxectos**, coas condicións e requisitos indicados no documento A, incorporado como anexo ao modelo de convenio de concesión

directa (anexo III) do presente convenio, e cun importe máximo de 570.000€, en concepto de subvención.

Aportación económica total de GAIN (aportación ao Consorcio e axudas aos proxectos):

En base ao anterior, as **achegas económicas previstas para o financiamento da Cuarta Edición do programa VIAGALICIA e dos proxectos que do mesmo xurdan**, son as que se indican a continuación:

APLICACIÓN ORZAMENTARIA	Desglose por anualidades			Total
	2016	2017	2018	
Financiamento de GAIN ao Consorcio 09.A3.561A.640.0	125.356€ (IVE incluído)	158.389€ (IVE incluído)	0€	283.745€ (IVE incluído)
Financiamento do CONSORCIO	44.400€ (IVE non incluído)	56.100€ (IVE non incluído)	0€	100.500€ (IVE non incluído)
Subvención de GAIN aos proxectos 09.A3.561A.770.0	0€	570.000€	0€	570.000€
Contribución total prevista por parte de GAIN				853.745€

A posta en marcha e desenvolvemento do Programa VIAGALICIA, será cofinanciada por GAIN e o Consorcio, a razón dun 70% (GAIN) e dun 30% (Consorcio), as ditas porcentaxes de cofinanciamento calcúlanse sobre a base impositible do custo estimado (335.000€). Os importes de GAIN deberán incrementarse co correspondente IVE.

Respecto do financiamento ao CONSORCIO, nos importes indicados entenderase incluído o IVE.

Respecto da achegas aos proxectos, no importe indicado entenderase incluído o IVE, sempre e cando este supoña un custo real soportado polos beneficiarios, podendo ser considerado gasto subvencionable. En todo caso, deberá presentarse un certificado relativo á situación dos beneficiarios respecto do IVE.

A achega de GAIN poderá financiarse con cargo ao préstamo concedido polo MINECO para o desenvolvemento da *Estratexia Española de Innovación na Comunidade Autónoma de Galicia*.

2. c. Subvención en especie.

Así mesmo, prevese a **achega** por parte de GAIN e do CONSORCIO **para o desenvolvemento do Programa de Capacitación e Aceleración Tecnolóxica 4.0**, destinado a aqueles proxectos

con Tecnoloxías facilitadoras e de Fabrica 4.0, que, de ser o caso, se impartirá no CIS Ferrol - Centro de Innovación e Servizos do Deseño e a Tecnoloxía.

A achega por parte de GAIN terá a consideración de subvención en especie, segundo o disposto na Disposición Adicional Terceira da Lei 9/2007, do 13 de xuño, de subvencións de Galicia e no artigo 3 do regulamento do citado texto legal, relativa ás axudas en especie.

Custe total do Programa de Aceleración Tecnolóxica.	37.000€
Achega de GAIN	25.900€
Financiamento do CONSORCIO	11.100€

As cantidades anteriores non inclúen IVE.

A achega prevista por parte de GAIN non suporá desembolso.

GAIN contribuirá ao desenvolvemento do Programa de Capacitación e Aceleración Tecnolóxica mediante a posta a disposición do CIS Ferrol, achegando os recursos que se indican no orzamento do dito Programa de Capacitación, que se incorpora ao presente convenio como anexo IV

As achegas en especie xustificaranse nas memorias anuais correspondentes.

Réxime de pagamentos das achegas de GAIN ao Consorcio, e aos proxectos.

A totalidade das achegas económicas de GAIN estará destinada á posta en marcha e ao desenvolvemento de proxectos emprendedores, distribuída da seguinte maneira:

- **Pagamentos ao CONSORCIO; relativos aos gastos susceptibles de compensación:**

GAIN achegará un máximo de 283.745 euros (IVE incluído) destinados a financiar unha parte dos gastos realizados polo CONSORCIO para o desenvolvemento das diferentes fases do programa. Poderán financiarse todos aqueles gastos que de maneira indubidable estean relacionados co desenvolvemento das diferentes fases do Programa.

O anterior importe será aboado tras a presentación da factura do Consorcio e documentación que acredite a realización das actuacións financiadas, e o pago das mesmas, presentada no prazo e coas condicións indicadas no Anexo I do presente convenio.

Atendendo ao desenvolvemento das diferentes fases do Programa VIAGALICIA, o devandito importe aboarase de forma fraccionada, e en dous pagamentos, tal como se indica de seguido:



XUNTA
DE GALICIA



CONSORCIO
ZONA FRANCA
DE VIGO



1. Anualidade 2016: poderán ser aboados os gastos nos que se incorra nas diferentes fases da execución do proxecto ata un máximo de 125.356€ (IVE incluído), sempre que estes gastos se realicen con posterioridade á sinatura do convenio, e como máximo ata o 30 de novembro de 2016

A data límite de presentación da factura, xunto coa demais documentación que a acompañe, será o 10 de decembro de 2016

2. Anualidade 2017: poderán ser aboados os gastos relativos ao desenvolvemento a outras fases do Programa ata un máximo de 158.389€ (IVE incluído), sempre que se realicen desde o 1 de decembro de 2016 ata o 30 de novembro de 2017

A factura, e demais documentación para que se proceda ao pagamento da cantidade correspondente, deberá presentarse antes do 10 de decembro de 2017

Considerando que o desenvolvemento da Fase do Investors Day, no segundo semestre de 2017, depende nunha gran medida da programación xeral nacional e internacional de eventos de investidores, as datas concretas de celebración da citada Fase poderán experimentar variación, sendo incluso posible que a mesma se pospoña á anualidade 2018

No caso de que se producise a anterior situación, e fose necesaria a reprogramación das achegas monetarias de GAIN, e a ampliación da vixencia do convenio, deberá tramitarse a correspondente addenda.

- **Pagos aos proxectos, relativos ás axudas:**

A cantidade da eventual subvención é dun máximo de 570.000€ a repartir entre os 15 proxectos + ata 4 do sector Aeroespacial, seleccionados para a súa incorporación á Fase de Aceleradora.

Segundo o anterior, o número máximo de proxectos que se subvencionarán é de 19, sendo como máximo 4 deles do sector aeroespacial.

A devandita cantidade repartirase da forma seguinte:

1. Ata un máximo de 25.000 euros a cada un dos proxectos seleccionados, unha vez que o Consorcio certifique a relación de proxectos seleccionados polo Comité Técnico. Previamente á concesión das axudas, o Comité técnico procederá á valoración de cada

proxecto presentado, establecendo un ranking dos proxectos segundo a valoración obtida, en atención aos criterios previstos no anexo II. Na mesma páxina web do CONSORCIO na que se anuncia a convocatoria, publicarase o listado definitivo dos proxectos seleccionados.

Segundo o anterior, o importe máximo da axuda é de 475.000€

2. Ata un máximo de 5.000€ adicionais por proxecto, para aqueles proxectos que se incorporen á aceleradora e que proveñan da sede de Lugo

Ante a imposibilidade de coñecer de antemán o número de proxectos que estarán na devandita situación, estímase, aos efectos da indicación na presente cláusula do importe da axuda a reservar por parte de GAIN, que teoricamente todos os proxectos seleccionados poderán proceder da sede de Lugo.

Segundo o anterior, o importe máximo da axuda é de 95.000€

O outorgamento da correspondente subvención instrumentalizarase, de forma individual para cada seleccionado, mediante un convenio de concesión directa que, entre outros extremos, concretará:

- Importe e distribución das axudas (financiamento).
- Relación de gastos subvencionables.
- Obrigas dos beneficiarios.
- Réxime de pagamentos.
- Réxime de garantías.
- Alteración das actuacións.
- Compatibilidade con outras axudas.
- Réxime aplicable ás axudas e reintegro.
- Forma de xustificación e documentación a presentar para o aboo dos pagos previstos.
- Previsións en materia de subcontratación.

Incorpórase ao presente convenio, con carácter orientativo, o correspondente modelo de convenio de concesión directa.

Estas axudas estarán suxeitas ao disposto na Lei 9/2007, do 13 de xuño, de subvencións de Galicia; e ao Decreto 11/2009, do 8 de xaneiro, polo que se aproba o regulamento da devandita Lei; así como a normativa básica da Lei 38/2003, do 17 de novembro, General de Subvenciones, e o seu regulamento, aprobado polo Real Decreto 887/2006, do 21 de xullo.

Estarán suxeitas igualmente ao réxime de minimis establecido no Regulamento (UE) nº 1407/2013 da Comisión, do 18 de decembro de 2013, relativo á aplicación dos artigos 107 e 108 do Tratado de Funcionamento da Unión Europea ás axudas minimis (DOUE L352/1, do 24 de decembro de 2013).

En virtude do disposto no artigo 3.2 do devandito regulamento, o importe total das axudas de minimis concedidas por un estado membro a unha única empresa, non excederá de 200.000€ durante calquera período de tres exercicios fiscais. O dito límite máximo aplícase a todo o conxunto de axudas recibidas en concepto de minimis pola empresa, independentemente da forma en que se outorguen, ou do obxectivo perseguido.

Con base no anterior, xunto coa documentación xustificativa relacionada no documento que se incorpora aos convenios de concesión directa relativo á regulación das condicións das subvencións a conceder por parte de GAIN a cada un dos proxectos seleccionados, o beneficiario deberá presentar unha declaración do conxunto de axudas recibidas pola empresa en concepto de minimis, durante os dous exercicios fiscais anteriores, e durante o exercicio fiscal en curso.

As entidades cuxos proxectos foran subvencionados con anterioridade por GAIN no marco de calquera outro programa similar na súa fase de aceleración, quedarán excluídas da subvención de GAIN prevista neste convenio

3. Financiamento de XESGALICIA.

XESGALICIA, empresa pública dependente do IGAPE; poderá destinar aos 15 proxectos + ata 4 do sector Aeroespacial seleccionados na fase de aceleración do programa VIAGALICIA a cantidade máxima de 950.000 euros, a razón dun máximo de 50.000€ por proxecto, mediante préstamos participativos reembolsables concedidos a través do *Fondo GIE, Galicia Iniciativas Emprendedoras FCR – Pyme*, coa seguinte distribución anual:

Ano 2016	Ano 2017	Total
0€	950.000€	950.000€

Os 15 proxectos + ata 4 do sector Aeroespacial seleccionados para incorporarse á Fase de Aceleración, poderán optar por acceder, previa constitución en empresa, a un préstamo reembolsable concedido por XESGALICIA (Sociedad Gestora de Entidades de Inversión de Tipo Cerrado, S.A.U) a través do *Fondo GIE, Galicia Iniciativas Emprendedoras FCR – Pyme* pola cantidade investida na posta en marcha do proxecto, sen que o mesmo exceda de 50.000 euros por proxecto, conforme ás condicións e requisitos que a tal efecto se establezan por XESGALICIA, previo cumprimento dos requisitos establecidos no artigo 53 da Lei 12/2015, do 24 de decembro, de orzamentos xerais da Comunidade Autónoma de Galicia para o ano 2016.

Estas axudas serán compatibles con outras axudas establecidas por outra Administración Pública, organismo ou ente público ou privado, nacional ou internacional, para o mesmo fin, sen que en ningún caso, illadas ou en concorrencia con outras subvencións, axudas, ingresos ou recursos; superen o custo da actividade subvencionada.

4. Financiamento por parte de VIGO ACTIVO.

Pola súa parte, VIGO ACTIVO comprométese a achegar a cada un dos 15 proxectos + ata 4 do sector Aeroespacial que pasen á fase final de VIAGALICIA (Fase de Aceleración) e cumpran os requisitos, ata un máximo de 50.000 euros por proxecto. Estas achegas realizaranse, en todo caso, baixo a modalidade de préstamo participativo reembolsable.

Os termos e condicións de cada un dos préstamos formalizaranse, previa constitución en empresa, entre esta entidade e cada un dos 15 + ata 4 promotores. En calquera caso, as condicións, sexan as que foran, nunca poderán ser mais restritivas do que marca nin o propio réxime interno do prestamista, nin a normativa de aplicación.

Oitava.- Designación do comité técnico.

O Comité Técnico do Programa VIAGALICIA estará composto de xeito permanente por:

- O Director/a de o departamento de Promoción Económica do CZFV, ou persoa en quen delegue as súas facultades.

- O Director/a de o departamento de Servizos Avanzados do CZFV, ou persoa en quen delegue as súas facultades.
- O Director/a Xeral de VIGO ACTIVO, ou persoa en quen delegue as súas facultades.
- O Director/a de Área de Servizos da GAIN, ou persoa en quen delegue as súas facultades.
- O Directora/a Xeral de XESGALICIA, ou persoa en quen delegue as súas facultades.

Tódolos membros participan con voz e voto nas mesmas condicións.

Novena.- Vixencia.

Establécese como prazo de vixencia do presente Convenio o da duración da cuarta edición do proxecto VIAGALICIA, co límite máximo do 1 de xuño de 2018

O presente convenio suporá gasto para GAIN unicamente ata 30 de novembro de 2017, estendendo a súa vixencia ata o 1 de xuño de 2018, sen que a dita extensión supoña custe para GAIN, estando destinada ao peche do Programa.

Décima.- Comisión de seguimento.

Para o seguimento e control das accións recollidas no presente convenio, crearase una Comisión de Seguimento de composición, integrada, en principio, e salvo mutuo acordo das partes na súa modificación, polos seguintes membros:

- 1 membro por parte de GAIN, que actuará como presidente.
- 1 membro por parte do IGAPE.
- 1 membro por parte de XESGALICIA.
- 2 membros por parte do CONSORCIO.
- 1 membro por parte de VIGO ACTIVO.

A dita Comisión será a encargada de:

- Realizar o seguimento das actuacións do convenio.
- Propor solucións aos conflitos que puideran xurdir da aplicación e interpretación das cláusulas do convenio.
- Todas aquelas actuacións precisas para o correcto seguimento do presente convenio.

En canto á súa constitución, funcionamento e adopción de acordos; a citada Comisión rexerá pola normativa vixente en materia de órganos colexiados, regulados na sección terceira do capítulo primeiro, do título primeiro da Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

Décimo primeira.- Causas de resolución.

O presente Convenio resolverase polo incumprimento total ou parcial dalgunha das cláusulas que o regulan, ou polo transcurso do tempo estipulado. Así mesmo poderá resolverse por denuncia unilateral de calquera das partes, previa comunicación á outra parte con (1) un mes de antelación, cando concorra algunha das seguintes causas:

- a. Imposibilidade sobrevida para o seu cumprimento.
- b. Causas excepcionais que obriguen a modificar substancialmente o seu obxecto.
- c. Imposibilidade material de execución por circunstancias excepcionais que impidan o cumprimento dos compromisos adquiridos co mesmo.

Así mesmo, poderá resolverse por acordo expreso das partes.

Décimo segunda.- Publicidade e rexistro de convenios, transparencia e bo goberno.

A sinatura deste convenio suporá o consentimento expreso por parte do CONSORCIO para que a Administración Galega inclúa e faga públicos os datos referidos ao presente convenio, de conformidade co artigo 15 da Lei 1/2016, do 18 de xaneiro, de transparencia e bo goberno, relativo ás obrigas específicas en materia de información sobre convenios; e co disposto nos Decretos 126/2006, do 20 de xullo, e 132/2006, do 27 de xullo, polos que se regulan o rexistro de convenios da Xunta de Galicia, e os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, respectivamente.

O contido deste convenio será publicado na Base de Datos Nacional de Subvencións, nos termos previstos no artigo 20 da Lei 38/2003, do 17 de novembro, xeral de subvencións, modificado polo artigo 30.3 da Lei 15/2014, do 16 de novembro, de racionalización do sector público e outras medidas de reforma administrativa.

Décimo terceira.- Inexistencia de relación laboral.

A subscrición do presente convenio non implicará relación laboral, nin contractual nin de ningún outro tipo entre os profesionais que realicen as actividades obxecto do presente convenio e a Xunta de Galicia.

Décimo cuarta.- Deber de segredo e confidencialidade.

As partes asinantes comprométense a non utilizar nin revelar, mantendo en segredo, todos os datos que puideran obter en virtude da execución do presente Convenio e, en particular, toda a información á que teñan acceso en relación cos proxectos participantes en VIAGALICIA, facéndose extensiva esta obriga a todas as entidades ou empresas públicas que interveñan en nome das partes.

As disposicións desta cláusula continuarán vixentes durante un período de cinco anos a partir da data de sinatura deste documento, salvo consentimento expreso do CONSORCIO.

Tal e como se informa nas Bases da convocatoria da terceira edición do Programa VIAGALICIA, os datos de carácter persoal facilitados polos participantes incorporaranse incorporáranse ao correspondente ficheiro titularidade de cada un dos promotores: Consorcio Zona Franca de Vigo con NIF V-36.611.580, Vigo Activo S.C.R., S.A. con NIF A-36.759.231, Instituto Galego de Promoción Económica con NIF Q-6550010-J, Xesgalicia, S.G.E.I.C., S.A.U con NIF A-15.674.203 e Axencia Galega de Innovación con NIF Q-1500386-F.

Os promotores levarán a cabo un tratamento dos devanditos datos a fin, exclusivamente, de avaliar e valorar os proxectos presentados, de xestionar a participación no Programa e de difundilo e facer promoción pública do mesmo. Os promotores non recollerán, utilizarán ou revelarán información persoal para outros propósitos que non sexan os descritos anteriormente, a non ser que os participantes dean o seu consentimento ou haxa algunha obrigación legal.

En cumprimento do disposto na Lei Orgánica 15/1999, do 13 de decembro, de Protección de Datos de carácter persoal, nin o CONSORCIO, nin VIGO ACTIVO, nin GAIN, nin XESGALICIA, nin ningún dos seus representantes que participen no proxecto VIAGALICIA poderán facer ningún tratamento dos datos persoais a os que, en virtude do disposto no presente Convenio, puidesen ter acceso.

Ao marxe do anterior, queda expresamente prohibida a utilización polas partes dos datos persoais aos que potencialmente puideran ter acceso.

As obrigas desta sección non supoñen restrición ningunha ás Partes de cara a poder cumprir cas obrigas legais ou mandatos de calquera tribunal ou entidade gobernamental.

Non se inclúe no concepto de confidencialidade a información que fose de dominio público con anterioridade ao momento da celebración do presente convenio, ou que pase a selo con posterioridade ao mesmo, nin aquela que fora obxecto de autorización previa e expresa por escrito entre as partes.

Décimo quinta.- Modificación do convenio.

Segundo as previsións do artigo 31.4 da Lei 14/2013, do 26 de decembro, de racionalización do sector público autonómico, relativo á contratación sustentable, os convenios subscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sustentabilidade financeira.

As ditas modificacións terán por obxecto a redución do volume das obrigas ou a ampliación do seu prazo de execución.

Toda alteración a realizar referente ao contido do presente convenio será proposta pola Comisión de seguimento e deberá formalizarse na correspondente addenda.

Exceptúase do disposto no apartado anterior, toda alteración das actuacións relativas aos proxectos presentados, que se rexerán polas previsións recollidas documento que se incorpora aos convenios de concesión directa, relativo á regulación das condicións das subvencións a conceder por parte de GAIN a cada un dos proxectos seleccionados.

Décimo sexta.- Cesión.

Os dereitos e obrigas asumidos por cada unha das partes baixo este convenio non poderán cederse a terceiras persoas, sen consentimento previo e por escrito da outra parte. A estes efectos enténdese por terceiras persoas aquelas que non estean vinculadas organicamente ás partes.

Décimo sétima.-Natureza xurídica e resolución de conflitos.

O presente Convenio ten natureza administrativa e rexerase polo establecido nestas cláusulas e polo disposto na Lei 9/2007, do 13 de xuño, de subvencións de Galicia; así como no Decreto 11/2009, do 8 de xaneiro, polo que se aproba o Regulamento de dita Lei; e pola restante normativa que, no seu caso, resulte de aplicación.

De acordo co artigo 4.1.d) do Texto Refundido da Lei de Contratos do Sector Público, aprobado polo Real Decreto Legislativo 3/2011, do 14 de novembro, o presente Convenio está excluído do ámbito de aplicación da devandita normativa.

As partes comprométense a resolver de común acordo calquera controversia que puidera suscitarse sobre a interpretación ou execución deste Convenio, someténdoo á comisión de seguimento prevista no mesmo. En caso de persistir o desacordo, someterase á xurisdición contencioso administrativa, conforme ao disposto na Lei 29/1998, de 13 do xullo, reguladora de dita xurisdición.

E en proba de conformidade, subscriben o presente documento por duplicado exemplar no lugar e data indicados no encabezamento.

O Conselleiro de Economía, Emprego e
Industria.

A Delegada Especial do Estado.

Francisco José Conde López.

Teresa Pedrosa Silva.

ANEXO I

DOCUMENTACIÓN A PRESENTAR POR PARTE DO CONSORCIO, RELATIVA AOS GASTOS SOPORTADOS PARA O DESENVOLVEMENTO DO PROGRAMA VIAGALICIA, PARA O PAGO DA COMPENSACIÓN DOS GASTOS DERIVADOS DA POSTA EN MARCHA E DESENVOLVEMENTO DAS FASES DO PROGRAMA VIAGALICIA.

O CONSORCIO deberá presentar, para o pago das cantidades previstas na cláusula sétima, relativa á compensación de parte dos gastos incorridos polo mesmo para a posta en marcha e desenvolvemento das diferentes fases do Programa VIAGALICIA; a seguinte documentación:

Respecto do cofinanciamento de GAIN:

- Facturas correspondentes, acompañadas dunha memoria na que se recolla unha descrición das tarefas desenvolvidas.

Á primeira factura acompañarase dun Certificado de titularidade da conta na que se deben realizar os pagos, no dito certificado deberá constar a razón social da entidade, o código internacional de conta bancaria (IBAN) ou o código internacional de identificación bancaria (BIC/SWIFT).

Respecto do cofinanciamento do propio CONSORCIO:

- Memoria na que se indique:
 1. Concepto do pago e finalidade do mesmo respecto das actividades do Convenio.
 2. Factura do gasto.
 3. Xustificante do pago (transferencia, certificación bancaria orixinal ou extractos de pago, etc).

A posta en marcha e desenvolvemento do Programa VIAGALICIA, será cofinanciada por GAIN e o Consorcio, a razón dun 70% (GAIN) e dun 30% (Consortio), as ditas porcentaxes de cofinanciamento calcúlanse sobre a base impositiva do custo estimado (335.000€). Os importes de GAIN deberán incrementarse co correspondente IVE.

En todo caso, a achega de GAIN, verase reducida proporcionalmente á diminución dos custes efectivamente soportados polo CONSORCIO, respectando en todo momento as porcentaxes

de participación, de xeito tal, que a achega efectiva de GAIN, será como máximo do 70% da cantidade soportada e efectivamente acreditada polo CONSORCIO.

O devandito importe aboarase de forma fraccionada en dous pagamentos, tal como se indica de seguido:

1. Anualidade 2016: poderán ser aboados os gastos nos que se incorra nas diferentes fases de execución do proxecto ata un máximo de 125.356€ (IVE incluído), sempre que estes gastos se realicen con posterioridade á sinatura do convenio, e como máximo ata o 30 de novembro de 2016.

A data límite de presentación da factura, xunto coa demais documentación que a acompañe, será o 10 de decembro de 2016.

2. Anualidade 2017: poderán ser aboados os gastos relativos ao desenvolvemento a outras fases do Programa ata un máximo de 158.389€ (IVE incluído), sempre que se realicen desde o 1 de decembro de 2016 ata o 30 de novembro de 2017.

A factura, e demais documentación para que se proceda ao pagamento da cantidade correspondente, deberá presentarse antes do 10 de decembro de 2017.

Considerando que o desenvolvemento da Fase do Investors Day, no segundo semestre de 2017, depende nunha gran medida da programación xeral nacional e internacional de eventos de investidores, as datas concretas de celebración da citada Fase poderán experimentar variación, sendo incluso posible que a mesma se pospoña á anualidade 2018

No caso de que se producise a anterior situación, e fose necesaria a reprogramación das achegas monetarias de GAIN, e a ampliación da vixencia do convenio, deberá tramitarse a correspondente addenda.

ANEXO II

BASES DO PROGRAMA VIAGALICIA 2016: CRITERIOS DE ELEXIBILIDADE E AVALIACIÓN, E DEMAIS ASPECTOS RELATIVOS AO DESENVOLVEMENTO DO DITO PROGRAMA.

A) Criterios de elixibilidade:

Poderán participar no programa mencionado na cláusula segunda do presente convenio, as iniciativas emprendedoras de carácter innovador, xa sexa en produtos / servizos, ou en procesos e / ou no modelo de negocio.

Os requisitos mínimos de acceso ao programa son os seguintes:

- Equipo promotor da iniciativa: estará formado por un mínimo de dúas (2) persoas.
- Todos os membros do dito equipo deberán ser maiores de idade.
- Número de candidaturas: cada participante poderá participar en cantas considere oportuno, podendo unicamente optarse pola elixibilidade dunha única candidatura.
- A iniciativa emprendedora poderá estar constituída formalmente cunha antigüidade máxima de corenta e dous meses contados dende a data de inicio do prazo de presentación de candidaturas. Neste senso, o Comité Técnico poderá aceptar candidaturas que teñan superado este prazo máximo no suposto de que no teñan iniciado actividade, ou o de que a súa cifra de ingresos non sexa suficientemente significativa, por encontrarse, a modo de exemplo, en fase de investigación, desenvolvemento, validación ou certificación. En relación a este aspecto, o Comité Técnico resérvase a posibilidade de non aceptar aquelas candidaturas nas que se observe un suposto de sucesión de empresa e de transformación da forma xurídica.
- Os promotores deberán ser os autores intelectuais das ideas que presentan ou, no seu defecto, non facer uso da propiedade intelectual e / ou industrial de terceiros sen os permisos correspondentes.

B) Criterios de avaliación.

B.1 Criterios xerais:

Os proxectos cumprirán catro (4) criterios fundamentais, que se irán modulando ao longo das diferentes fases:

1. Grao de innovación: entendido como a base científica, tecnolóxica ou de coñecemento na que se apoia, así como os elementos diferenciadores nos que incorpora a proposta de valor.
2. Grao de investibilidade: entendido como a identificación dun nicho de mercado e a definición dun modelo de negocio que permita ao proxecto escalar a súa proposta de valor, e ofrecer un retorno do investimento suficiente ao potencial inversor.
3. Grao de acelerabilidade e de escalabilidade: entendidos a acelerabilidade como o grao de desenvolvemento actual do proxecto, así como a capacidade para executar o dito proxecto e desenvolver nun prazo inferior a seis (6) meses un produto mínimo viable, ou MVP, considerado como a versión do produto/servizo que permite a un equipo captar e validar con clientes o máximo volume de coñecemento co menor esforzo posible. A escalabilidade entendida como o potencial de crecemento e a capacidade de internacionalización do mesmo, así como a súa orientación global.
4. Grao de Relevancia: entendido como a inclusión do proxecto nun sector de actividade estratéxico para o desenvolvemento de Galicia, que o permita constituírse coma unha iniciativa viable e que contribúa á dinamización do tecido empresarial.

Estes criterios fundamentais utilizaranse en todas aquelas fases nas que o Comité Técnico proceda a valorar aos diferentes proxectos, adaptando a descrición dos devanditos criterios aos requirimentos específicos e ao grao de desenvolvemento esixido para cada unha destas fases.

B.2. Criterios específicos:

Fase I - Convocatoria.

Ademais dos criterios xerais xa indicados, tras a entrevista avaliarase como aspecto adicional, o seguinte:

- Grao de solidez e acelerabilidade do equipo: para determinalo, o Comité terá en conta os seguintes aspectos:
 - a) Habilidades e competencias de cada un dos membros de forma individual.
 - b) Carácter multidisciplinar.

- c) Grao de complementariedade do mesmo, de forma que este sexa capaz de deseñar, executar e acelerar e xestionar o seu proxecto.
- d) Grao de compromiso e dedicación dos promotores do proxecto.

Tras esta valoración elaborárase unha relación co ranking dos proxectos finalmente aceptados, ata un máximo de 40 para cada unha das futuras sedes, o que fará un máximo de 80 proxectos que pasarán á seguinte fase (startup day).

Fase II - Startup day.

Avaliaranse, como criterios específicos, os seguintes aspectos:

1. Habilidades persoais e competencias dos promotores, avaliadas en función dos resultados dunha serie de exercicios e dinámicas de grupo, a fin de enriquecer o perfil obtido previamente mediante o *test de auto avaliación do perfil* emprendedor: liderado, comunicación, traballo en equipo, capacidades de negociación e creatividade.
2. Grao de complementariedade e carácter multidisciplinar do equipo promotor, de cara a fomentar o desenvolvemento dun equipo perfectamente balanceado, así como a experiencia profesional e emprendedora previa, especialmente no ámbito sectorial da aplicación.

Tendo en conta unha combinación dos criterios que serven para o acceso á presente fase, e os que se consideran para determinar o acceso á seguinte fase (Academia), o Comité técnico elaborará un novo ranking de iniciativas, segundo o cal, como máximo os vinte (20) primeiros proxectos de cada unha das sedes (máximo de 40 proxectos en total), serán invitados formalmente a incorporarse á citada fase de Academia.

Os seleccionados deberán comunicar a súa aceptación antes da data que a tal efecto se indique. No caso de eventuais renuncias, o Comité técnico poderá seleccionar ao seguinte proxecto en valoración, sempre e cando este cumpra cos requisitos que lle resulten de aplicación.

Fase III - Academia.

A finalidade da participación na mesma é a maduración do proxecto.

O programa de capacitación previsto combina sesións de formación presenciais, sesións de networking e mesas redondas con emprendedores e outros actores relevantes do ecosistema de emprendimento, sesións de traballo con titores e con representantes das entidades promotoras e sesións de presentación pública dos diferentes proxectos.

Os diferentes equipos terán como obxectivos nesta fase:

- Validar as hipóteses de partida do seu modelo.
- Elaborar e entregar todos os documentos e entregables que lles sexan requiridos polos titores do Programa.
- Elaborar o Executive Summary e o Pitch para a presentación do seu proxecto ó Comité Técnico do Programa.

Os criterios que se terán en conta na presente fase, son os seguintes:

1. Criterios de elixibilidade (excluíntes):

- a) Asistencia como mínimo de dous (2) membros do equipo de cada proxecto, polo menos ao 80% das sesións da Academia.
- b) Participación activa dos membros do equipo en todas as accións programadas durante esta fase.

2. Criterios de selección:

- a) Solidez e grao de implicación do equipo.
- b) Maduración significativa do proxecto e elaboración dos entregables citados; estes serán avaliados en base aos seguintes criterios formais:
 - 1. Grao de desenvolvemento formal da proposta de valor e do modelo de negocio.
 - 2. Grao de definición de produto mínimo viable.
 - 3. Grado validación das hipóteses de partida, así como a capacidade para iterar e pivotar do proxecto.
- b) Atractivo do pitch, entendido como a capacidade de comunicación da oportunidade de forma convincente.

Exclusión de candidaturas:

No caso de que algún membro de calquera dos equipos participantes non cumprise os compromisos asumidos na Declaración xurada, o Comité técnico resérvase o dereito a exixir o cumprimento dos mesmos, e de non ser así, procederase á exclusión da súa candidatura.

Os proxectos estarán sometidos a unha avaliación continua ao longo de toda a fase de Academia, os que non cumpran cos requisitos, obrigas e fitos establecidos poderán ser excluídos do mesmo e, en consecuencia, perder os beneficios, previo informe motivado do Comité técnico.

Fase IV - Demo day.

O obxectivo desta fase é que os equipos que superaran satisfactoriamente o Programa de Capacitación da Academia, presenten os seus respectivos proxectos ante o Comité técnico e as entidades colaboradoras.

Os criterios específicos que aplicará o Comité técnico do programa, son os seguintes:

1. Criterios de elixibilidade (excluíntes), deberanse acreditar os seguintes compromisos:
 - a) Constitución da sociedade, baixo a forma xurídica de Sociedade de Responsabilidade Limitada ou Sociedade Anónima.
 - b) Establecer, ou trasladar o seu domicilio social á Comunidade Autónoma de Galicia.
 - c) Achea económica: no caso de que a sociedade se constitúa formalmente, a achega mínima conxunta será de tres mil euros (3.000€).
 - d) Dedicación a tempo completo dun mínimo de dous (2) membros do equipo, durante a duración da estancia na Aceleradora.
 - e) Desenvolvemento da actividade empresarial, e compromiso de presenza continuada, de como mínimo os dous (2) promotores principais do proxecto, no Coworking do Centro de Negocios de Porto do Molle, en Nigrán durante a duración da estancia na Aceleradora.
 - f) Garantir o dereito de explotación da tecnoloxía na cal se apoia o proxecto. No caso de que a propiedade intelectual pertenza a un terceiro, o equipo promotor deberá

presentar a documentación do titular na que se acredite a cesión do dereito de explotación de dita tecnoloxía, e as condicións de uso da mesma.

g) Garantir a existencia de pactos parasociais nos que se estableza como contido mínimo o seguinte:

- Datos de identificación dos socios.
- Porcentaxe de participación dos socios.
- Compromiso dos socios de permanencia durante o período de aceleración.

h) Asistir ás sesións de tutoría planificadas no Centro de Negocios de Porto do Molle. Será imprescindible que acuda ás mesmas, como mínimo, uno dos promotores principais de cada un dos proxectos.

i) Asistir ás actividades que se planifiquen no Centro de Negocios de Porto do Molle, sendo imprescindible que ás mesmas acudan, como mínimo, dous (2) dos membros rexistrados do equipo.

O incumprimento dalgún destes criterios poderá ser causa de exclusión.

2. Criterios de selección:

Ademais dos criterios xerais de selección (innovación, acelerabilidade, escalabilidade, investibilidade e relevancia), valoraranse os seguintes criterios:

- a) Grao de solidez do equipo.
- b) Posta en escena e capacidade de comunicación durante o pitch.

Nesta fase, o Comité técnico seleccionará ata un máximo de quince (15) proxectos en total, aos que se lles propondrá formalmente o seguinte:

1. Financiamento:

1.1 Concesión dunha subvención por parte de GAIN, que será dun total de 25.000,00€ por proxecto, a finalidade da axuda é o financiamento dunha serie de gastos considerados como elixibles.

Para cada un dos proxectos que proveñan da sede de Lugo, incrementase a devandita contía en 5.000€ adicionais, como consecuencia do encarecemento dos proxectos que

proveñen da sede de Lugo (desenvolvemento das actividades de titorización, mentoring, etc).

1.2 Concesión dun préstamo participativo de ata un máximo de 50.000,00€ por proxecto, a través de Vigo Activo.

1.3 Concesión dun préstamo participativo de ata un máximo de 50.000,00€ por proxecto, a través de XesGalicia.

2. Incorporación á Aceleradora, situada no Centro de Negocios de Porto do Molle (Nigrán - Pontevedra).

Ambas as dúas propostas están ligadas entre si, sendo o financiamento achegado pola Aceleradora compatible con outras fontes de financiamento pública e privada, non obstante o anteriormente indicado, as entidades cuxos proxectos foran subvencionados con anterioridade por GAIN no marco de calquera outro programa similar na súa fase de aceleración, quedarán excluídas da subvención de GAIN prevista neste convenio.

Fase V - Aceleradora.

Os proxectos aprobados que aceptaron a proposta do Comité, e acreditado os compromisos citados anteriormente, poderán incorporarse á Aceleradora, que se ubicará no Coworking do Centro de Negocios de Porto do Molle, en Nigrán; e terán a cualificación do CONSORCIO de “Proxectos Invertibles” a proposta do Comité técnico do Programa.

Así mesmo, os proxectos relacionados con Tecnoloxías 4.0 e co sector aeroespacial, poderán complementar a súa formación e asesoramento nos centros especializados de: CIS FERROL - CENTRO DE INNOVACIÓN E SERVIZOS DO DESEÑO E A TECNOLOXÍA, e no EDIFICIO TECNOLÓXICO AEROESPACIAL DE PORTO DO MOLLE (en Nigrán).

O Comité técnico decidirá qué proxectos participarán no Investors Day en función do grao de aproveitamento e dos obxectivos alcanzados durante o período de aceleración.

No caso do incumprimento dos compromisos asinados na Declaración xurada, o Comité técnico resérvase o dereito de exixir o cumprimento, e de non ser así, de excluír a candidatura.

Os proxectos estarán sometidos a unha avaliación continua ao longo de toda a fase de Aceleración, polo que aqueles que non cumpran cos requisitos, obrigas e fitos establecidos

poderán ser excluídos do mesmo e, en consecuencia, perder os beneficios que deste se deriven, previo informe motivado do Comité técnico do Programa.

Fase VI - Investors day.

Os proxectos que superasen satisfactoriamente a fase anterior poderán presentarse ante un panel de inversores nacionais e internacionais no Investors Day, organizado polo CONSORCIO.

Os proxectos participantes deberán presentar un dossier de investimento que será facilitado aos inversores de forma previa ao Foro.

Os proxectos presentados ao panel de inversores serán avaliados segundo o seu mellor criterio profesional. Os inversores resérvanse o dereito de continuar as conversacións cos distintos proxectos e realizar unha oferta aos emprendedores.

C) Outros aspectos relativos ao desenvolvemento do Programa:

Compromisos dos candidatos:

Todos os proxectos que aceptaran a proposta do Comité técnico acreditarán, previamente á incorporación á Aceleradora, os compromisos que se relacionan de seguido:

- Achega económica: en caso de que a sociedade se constituía formalmente, a achega mínima conxunta será de tres mil euros (3.000€).
- Domicilio: fixarase o domicilio social na Comunidade Autónoma galega, e comprometerse a constituír a sociedade en Galicia.
- Asistencia e participación activa: como mínimo dous (2) dos membros rexistrados no equipo e con respecto á todas as accións do programa.
- Presenza continuada, como mínimo dos dous (2) promotores principais do proxecto, no Coworking do Centro de Negocios de Porto do Molle (Nigrán) durante a fase de aceleración, constituíndose neste como o centro da súa actividade empresarial durante este período.
- Colaboración nas diferentes actividades de promoción do Programa.



Incompatibilidades.

Non poderá presentar proxectos o persoal vinculado ás entidades con representación no Comité técnico: CONSORCIO, GAIN, XESGALICIA e VIGO ACTIVO.

Así mesmo, tampouco poderá presentar proxectos, o persoal vinculado ás Entidades colaboradoras no deseño e/ou execución do Programa, para a presente edición.

ANEXO III

MODELO DE CONVENIO DE CONCESIÓN DIRECTA.

CONVENIO DE COLABORACIÓN ENTRE A AXENCIA GALEGA DE INNOVACIÓN E _____ MEDIANTE O CAL SE PROCEDE Á REGULACIÓN DAS CONDICIÓNS DE EXECUCIÓN DAS SUBVENCÍONS PREVISTAS NO CONVENIO DE COLABORACIÓN ASINADO ENTRE A AXENCIA GALEGA DE INNOVACIÓN, O INSTITUTO GALEGO DE PROMOCIÓN ECONÓMICA, XESGALICIA SOCIEDAD GESTORA DE ENTIDADES DE INVERSIÓN DE TIPO CERRADO S.A.U., O CONSORCIO DA ZONA FRANCA DE VIGO E VIGO ACTIVO SOCIEDAD DE CAPITAL DE RIESGO DE RÉGIMEN SIMPLIFICADO SA; PARA O DESENVOLVEMENTO DA CUARTA EDICIÓN DO PROGRAMA VIAGALICIA.

Santiago de Compostela, _____

REUNIDOS:

Dunha parte, D. FRANCISCO JOSÉ CONDE LÓPEZ, Conselleiro de Economía, Emprego e Industria da XUNTA DE GALICIA, nomeado para o devandito cargo polo Decreto 116/2015, do 4 de outubro (DOG nº190, do 5 de outubro), actuando no exercicio das atribucións conferidas polo artigo 34 da Lei 1/1983, do 22 de febreiro, de normas reguladoras da Xunta e da súa Presidencia e polo Decreto 175/2015, do 3 de decembro, polo que se establece a estrutura orgánica da Consellería de Economía, Emprego e Industria; Presidente da Axencia Galega de Innovación (en diante, GAIN), en virtude do disposto no artigo 12 do Decreto 50/2012, do 12 de xaneiro, polo que se crea a Axencia Galega de Innovación e se aproban os seus estatutos.

Doutra parte, D/Dna. _____, con NIF _____, e domicilio aos efectos de notificacións en _____, en nome e representación de _____, promotor do proxecto _____.

EXPOÑEN:

I. Que A Axencia Galega de Innovación (en diante, GAIN), o Instituto Galego de Promoción Económica (en diante, IGAPE), XESGALICIA Sociedad Gestora de Entidades de Inversión de Tipo Cerrado SAU (en diante, XESGALICIA), o Consorcio da Zona Franca de Vigo (en diante, o CZFV) e Vigo Activo Sociedad de Capital de Riesgo de Régimen Simplificado (en diante, VIGO ACTIVO), asinaron un convenio de colaboración para o desenvolvemento da cuarta edición do Programa VIAGALICIA.

II. Que o citado convenio prevé diversas achegas económicas para os proxectos cualificados de *invertibles* polo Comité técnico do Programa VIAGALICIA, condición que cumpre o proxecto anteriormente indicado.

Con base no exposto, ambas as dúas partes acordan subscribir o presente convenio de colaboración, con suxeición ás seguintes,

CLÁUSULAS:

Primeira.- Obxecto.

O presente Convenio ten por obxecto regular os termos e condicións de execución da subvención prevista no convenio asinado entre GAIN, o IGAPE, XESGALICIA e VIGO ACTIVO, para o desenvolvemento na cuarta edición do Programa VIAGALICIA.

Incorporarase ao presente convenio, un documento descritivo das características particulares do proxecto, segundo o modelo que a tal efecto se facilita.

Segunda.- Obrigas do beneficiario.

Sen prexuízo das demais obrigas establecidas no artigo 11 da Lei 9/2007, do 13 de xuño, de subvencións de Galicia, os beneficiarios das axudas concedidas quedan obrigados a:

- a) Proceder ao reintegro, da subvención percibida, no suposto de incumprimento das condicións de participación no programa VIAGALICIA, sinalados no Anexo II.
- b) Facilitar a información que lles sexa requirida pola Intervención Xeral da Comunidade Autónoma, polo Tribunal de Contas e polo Consello de Contas no exercicio das súas funcións de fiscalización e control do destino das subvencións; e someterse ás actuacións de comprobación que deban efectuar os devanditos órganos relativas ao control financeiro, e demais aplicables; así como as levadas a cabo polo órgano concedente; e no seu caso, ás da autoridade de xestión, ás verificacións do artigo 13 do Regulamento (CE) nº 1828/2006 e, de ser o caso, ás dos servizos financeiros da Comisión Europea e do Tribunal de Contas Europeo, e achegar tanta información lles sexa requirida no exercicio das actuacións anteriores.
- c) Comunicar ao órgano concedente a obtención de subvencións, axudas, ingresos ou recursos que financien as actividades subvencionadas. Esta comunicación deberá efectuarse tan pronto como se coñeza e, en todo caso, con anterioridade á xustificación da aplicación dada aos fondos percibidos.
- d) Xustificar, nos casos nos que o importe do gasto subvencionable supere as contías establecidas no texto refundido da Lei de Contratos do Sector Público, aprobado polo Real Decreto legislativo 3/2011, do 14 de novembro, para o contrato menor; a solicitude como

mínimo tres ofertas de diferentes provedores, con carácter previo á contratación do compromiso para a obra, prestación do servizo ou entrega do ben, salvo que polas súas especiais características non exista no mercado suficiente número de entidades que as realicen, presten ou subministren, ou salvo que o gasto se realizara con anterioridade á solicitude da subvención, de acordo co establecido no apartado 3 do artigo 29 da Lei 9/2007, do 13 de xuño, de subvencións de Galicia, na redacción dada ao mesmo pola disposición final segunda da Lei 2/2013, do 27 de febreiro, de orzamentos xerais da Comunidade Autónoma de Galicia para o ano 2013

- e) Prestar consentimento expreso á publicidade por parte da Administración Galega dos datos referidos ao presente convenio, de conformidade co artigo 15 da Lei 1/2016, do 18 de xaneiro, de transparencia e bo goberno, relativo ás obrigas específicas en materia de información sobre convenios; e co disposto nos Decretos 126/2006, do 20 de xullo, e 132/2006, do 27 de xullo, polos que se regulan o rexistro de convenios da Xunta de Galicia, e os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, respectivamente.
- f) Prestar consentimento expreso á publicación na Base de Datos Nacional de Subvencións, nos termos previstos no artigo 20 da Lei 38/2003, do 17 de novembro, xeral de subvencións, modificado polo artigo 30.3 da Lei 15/2014, do 16 de novembro, de racionalización do sector público e outras medidas de reforma administrativa.
- g) Dar cumprimento ás obrigas de publicidade que se establecen no artigo 18 da Lei 38/2003, do 17 de novembro, xeral de subvencións, modificado polo artigo 30.2 da Lei 15/2014, do 16 de setembro, de racionalización do sector público e outras medidas de reforma administrativa.

Terceira- Financiamento.

O importe total da axuda a conceder por parte de GAIN é dun máximo de _____€.

No caso de que o proxecto proceda da sede de Lugo, a anterior axuda verase incrementada en 5.000€ adicionais, como consecuencia do encarecemento dos mesmos (desenvolvemento das actividades de titorización, mentoring, etc).

Así mesmo, no caso de que o proxecto incorpore tecnoloxías facilitadoras e de Fabrica 4.0, con carácter complementario ás axudas previstas anteriormente, poderán realizarse actividades nas distintas fases do programa no CIS Ferrol - Centro de Innovación e Servizos do Deseño e a Tecnoloxía, mediante o desenvolvemento dun Programa de Capacitación e Aceleración Tecnolóxica, que se encadra nas fases de Academia, para o relativo á Capacitación, e na fase de Aceleradora, para o relativo á Aceleración Tecnolóxica. Neste caso, a achega de GAIN no relativo ao desenvolvemento do Programa de Aceleración Tecnolóxica, terá a consideración de subvención en especie no que se refire ao Programa de Aceleración Tecnolóxica 4.0, ascendendo a _____€

Para determinar a procedencia do pago das axudas ao beneficiario, terase en conta a certificación emitida polo CONSORCIO, relacionando os proxectos cualificados, polo Comité Técnico do Programa, como “invertibles” e incorporados definitivamente á Aceleradora.

Cuarta- Réxime de pagamentos.

Ao amparo do previsto nos artigos 31.6 da Lei 9/2007, do 13 de xuño de subvencións de Galicia e nos artigos 62 e 63 do Regulamento de desenvolvemento de dita Lei; poderase realizar pagos anticipados, respondendo estes a entregas de fondos con carácter previo á xustificación, como financiamento necesario para poder levar a cabo as actuacións inherentes á subvención, sendo as mesmas o desenvolvemento dos proxectos que resulten seleccionados para a súa incorporación á Fase de Aceleradora, de acordo coa seguinte distribución:

1) Primeiro pagamento.

Poderá pagarse ata un máximo dun 80% da cantidade destinada a cada un dos proxectos seleccionados, de forma anticipada; unha vez iniciado o exercicio 2017, e previa solicitude e entrega completa de toda a documentación solicitada para poder facerse efectivo este anticipo , presentada antes do 31 de marzo, nas condicións que se indican no presente convenio.

2) Pagamento final e xustificación do mesmo.

A cantidade restante destinada a cada un dos proxectos seleccionados, pagarase tras a solicitude e xustificación nas condicións que se indican no presente convenio.

O libramento do presente pago requirirá o visto conforme de GAIN á xustificación e restante documentación presentada.

A solicitude para que se proceda ao pagamento da citada cantidade, deberá ser presentada antes do 1 de novembro de 2017.

Como complemento da citada documentación, GAIN recibirá o informe do titor designado por parte do CONSORCIO, no que se verifique y valide a adecuación dos gastos ós fitos ou actividades planificadas e realizadas no desenvolvemento do Programa.

Quinta- Gastos subvencionables.

A modo indicativo, considéranse elixibles os seguintes conceptos:

- Adquisición de equipamento e material instrumental.
- Subcontratacións con organismos de investigación, cun límite máximo do cincuenta por cento (50%) da axuda.
- Gastos de asesoramento no rexistro de patentes.
- Servizos de apoio para a elaboración do plan de negocio, para a saída ao mercado, ou para a busca de inversores.
- Calquera outro que se considere relevante para a viabilidade do proxecto empresarial.

Cando o importe do gasto subvencionable supere as contías establecidas para os contratos menores no texto refundido da Lei de contratos do sector público, aprobado por Real Decreto Legislativo 3/2011, do 14 de novembro; o beneficiario deberá solicitar como mínimo 3 ofertas de diferentes provedores, con carácter previo á contratación do compromiso, salvo que, polas súas especiais características, non exista no mercado suficiente número de entidades, ou salvo que o gasto se realizara con anterioridade á solicitude da subvención.

A Xunta de Galicia achegará o financiamento destas axudas a través dos mecanismos previstos no ordenamento xurídico, sendo condición indispensable para a súa concesión, o cumprimento por parte dos seleccionados dos requisitos legais para ser beneficiarios.

Sexta- Réxime de garantías .

O artigo 65 do Decreto 11/2009, do 8 de xaneiro, polo que se aproba o Regulamento da LSG, establece a obrigatoriedade de beneficiarios e entidades colaboradoras, de constitución de

garantías, nos casos, entre outros, nos que se prevé a posibilidade de realización de pagos anticipados.

O presente convenio establece o pago anticipado de ata un 80% da cantidade destinada ao financiamento do proxecto.

Considerando que a finalidade que se persegue con dita achega, é dar apoio aos diferentes proxectos, facilitando a formalización ou constitución dos mesmos en empresas, e reducindo a carga económica que soporta calquera empresa, tanto nas súas orixes, como no inicio da súa actividade; exonérase da constitución de garantía legalmente prevista; conforme á previsión recollida no artigo 67 do Regulamento da LSG, relativo á posibilidade de autorización por parte do Consello de la Xunta, da exención da obriga de constitución de garantías.

Sétima- Alteración das actuacións.

A necesidade de modificar as actuacións a realizar, en canto que supón alteración das condicións tidas en conta á hora da concesión, poderá dar lugar á modificación da subvención concedida. En calquera caso, só se procederá á citada modificación, tras o informe favorable do Comité Técnico de VIAGALICIA.

O procedemento de aprobación de modificación das actuacións iniciárase coa solicitude por parte do interesado, na dita solicitude deberá indicarse o alcance da modificación proposta, de xeito tal que queden claras as actuacións a modificar e o desenvolvemento do proxecto. A devandita solicitude presentárase no rexistro da Axencia Galega de Innovación, o citado rexistro está na Praza de Europa, 10-A, 6ºB, CP 15707 de Santiago de Compostela.

Logo da devandita solicitude, GAIN procederá a recadar o correspondente informe favorable ou visto e praxe do Comité técnico de VIAGALICIA.

Tras as anteriores actuacións, GAIN aprobará, no seu caso, a modificación proposta.

A anterior modificación, de producirse, formalizarase no correspondente documento ou addenda.

Segundo as previsións do artigo 31.4 da Lei 14/2013, do 26 de decembro, de racionalización do sector público autonómico, relativo á contratación sustentable, os convenios subscritos pola Administración xeral da Comunidade Autónoma e as entidades instrumentais do sector público

autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sustentabilidade financeira.

As ditas modificacións terán por obxecto a redución do volume das obrigas ou a ampliación do seu prazo de execución.

Oitava- Compatibilidade con outras axudas

Estas axudas serán compatibles con outras establecidas por esta ou outra Administración Pública, organismo ou ente público ou privado, nacional ou internacional para o mesmo fin sen que, en ningún caso, illada ou en concorrencia con outras subvencións, axudas, ingresos ou recursos, supere o custo da actividade subvencionada.

Non obstante o anteriormente indicado, as entidades cuxos proxectos foran subvencionados con anterioridade por GAIN no marco de calquera outro programa similar na súa fase de aceleración, quedarán excluídas da subvención de GAIN prevista neste convenio.

Novena- Réxime aplicable e reintegro

Estas axudas estarán suxeitas ao disposto na Lei 9/2007, do 13 de xuño, de subvencións de Galicia; Decreto 11/2009, de 8 de xaneiro, polo que se aproba o seu regulamento, así como a normativa básica da Lei 38/2003, do 17 de novembro, Xeral de Subvencións e o seu Regulamento de desenvolvemento, aprobado polo Real Decreto 887/2006, do 21 de xullo.

Procederá o reintegro parcial ou total dos fondos percibidos no suposto de incumprimento das condicións establecidas para a súa concesión nos termos previstos no Título II da Lei 9/2007, do 13 de xuño, de subvencións de Galicia.

Igualmente procederá o reintegro (total ou parcial) no caso de incumprimento e / ou mal aproveitamento da aceleración por parte de algún dos proxectos seleccionados na fase final, o que deberá reflectirse nun informe suficientemente motivado.

Estarán suxeitas igualmente ao réxime de minimis establecido no Regulamento (UE) nº 1407/2013 da Comisión, do 18 de decembro de 2013, relativo á aplicación dos artigos 107 e 108 do Tratado de Funcionamento da Unión Europea ás axudas minimis (DOUE L352/1, do 24 de decembro de 2013).

Décima- Documentación a presentar para a solicitude do aboo dos pagos previstos.

A documentación presentárase no rexistro da Axencia Galega de Innovación, o citado rexistro está na Praza de Europa, 10-A, 6ºB, CP 15707 de Santiago de Compostela.

Xunto coa documentación xustificativa relacionada, o beneficiario deberá presentar unha declaración do conxunto de axudas recibidas pola empresa en concepto de minimis, durante os dous exercicios fiscais anteriores, e durante o exercicio fiscal en curso.

Así mesmo presentará unha declaración complementaria do conxunto de axudas solicitadas, tanto as aprobadas ou concedidas como as pendentes de resolución, para o mesmo proxecto, das administracións públicas competentes ou das súas entidades vinculadas ou dependentes, así como de entes privados.

A. Documentación precisa para o abono do primeiro pagamento.

O beneficiario deberá presentar a seguinte documentación:

1. Solicitude de pago.
2. NIF / pasaporte.
3. Certificado de entidade financeira relativo á titularidade da conta onde se debe realizar o pago, no que conste a razón social e NIF, así como o código internacional de conta bancaria (IBAN) ou o código internacional de identificación bancaria (BIC/SWIFT).
4. Certificacións de estar ao corrente das obrigas tributarias estatais, coa comunidade autónoma e coa Seguridade Social, ou autorización expresa para realizar as ditas consultas.
5. Declaración responsable de non estar incurso en ningunha das prohibicións para a obtención de subvencións contempladas no artigo 10 da Lei 9/2007, do 13 de xuño, de subvencións de Galicia.

A anterior solicitude, xunto coa documentación que a acompañe, haberá de presentarse unha vez iniciado o exercicio 2017, e antes do 31 de marzo.

B. Documentación a presentar para o pago final.

Tras a finalización das diferentes fases de programa, e antes do 1 de novembro de 2017, o beneficiario deberá presentar, para o pago da cantidade prevista na cláusula sétima, relativa

ao financiamento de actividades relacionadas coa execución de proxectos seleccionados para a súa incorporación a Fase Aceleradora; a seguinte documentación:

1. Solicitud de pago.
2. NIF / pasaporte (no caso de solicitante diferente).
3. No caso de non autorizar a consulta, certificacións de estar ao corrente das obrigas tributarias estatais, coa comunidade autónoma e coa Seguridade Social, no caso de que as presentadas ao momento da solicitude de pago do anticipo, non se encontrasen vixentes.
4. No caso de estar exento do IVE, documentación acreditativa da dita exención.
5. Carta de pagamento á que fai referencia o artigo 48.2.g) do Decreto 11/2009, do 8 de xaneiro, polo que se aproba o Regulamento da Lei de subvencións de Galicia, relativa ao reintegro de remanentes non aplicados, así como os xuros derivados destes; esixible nos casos nos que se prevé a posibilidade de concesión de anticipos.
6. Memoria xustificativa de actuacións: xustificarse o cumprimento das condicións impostas na concesión da subvención, indicando actividades realizadas e obxectivos conseguidos. O beneficiario poderá achegar calquera outra documentación ou material que considere necesario presentar para unha mellor xustificación das actuacións subvencionadas. A citada memoria xustificará tanto as actuacións levadas a cabo con cargo ao anticipo cobrado, como as relativas ao cobro da cantidade restante.
7. Memoria económica xustificativa: xustificarse o custo das actividades realizadas, mediante:
 - a. Relación clasificada dos gastos e investimentos na posta en marcha do proxecto, con identificación do acredor e do documento, o seu importe, data de emisión e, no seu caso, data de pago.
 - b. Xustificación dos gastos realizados: orixinais ou copias compulsadas das facturas ou dos documentos de valor probatorio equivalente no tráfico xurídico mercantil ou con eficacia administrativa incorporados na relación a que se fai referencia no parágrafo anterior emitidas dentro da anualidade correspondente.

- c. Xustificación dos pagos efectuados: transferencia bancaria, certificación bancaria orixinal ou extracto de pago. Nestes documentos deberán quedar claramente identificados o/a receptor/a, o/a emisor/a e o concepto do pago. Non se admitirán os pagos en efectivo.

Décimo primeira- Subcontratación

En relación coa posibilidade de subcontratación, os beneficiarios deberán achegar unha declaración expresa de que as persoas ou entidades contratadas e/ou subcontratadas para as actividades subvencionadas non están vinculadas con el, de conformidade co artigo 27.7 da Lei 9/2007, do 13 de xuño, de subvenciones de Galicia e no seu Regulamento.

Décimo segunda.- Mecanismos de seguimento e execución.

Para o correcto seguimento das accións do convenio, crearase unha comisión de seguimento, paritaria entre representantes de GAIN e representantes da entidade beneficiaria.

Décimo terceira.- Vixencia.

O presente convenio estará vixente dende o día seguinte ao da súa sinatura ata o 31/12/2017, sen posibilidade de prórroga.

Décimo cuarta.- Natureza xurídica e resolución de conflitos.

O presente convenio ten natureza administrativa e rexerase polo establecido nestas cláusulas e polo disposto na Lei 9/2007, do 13 de xuño, de subvencións de Galicia; así como no Decreto 11/2009, do 8 de xaneiro, polo que se aproba o Regulamento de dita Lei; e pola restante normativa que, no seu caso, resulte de aplicación.

E en proba de conformidade, subscriben o presente documento por duplicado exemplar no lugar e data indicados no encabezamento.

O Conselleiro de Economía, Emprego e
Industria.

(nome da entidade)

Francisco José Conde López.

MODELO DE DOCUMENTO DESCRIPTIVO DAS CARACTERÍSTICAS PARTICULARES DO PROXECTO.

- 1. Denominación proxecto:**
- 2. Empresa/CIF:**
- 3. Relación promotores/NIF:**
 -
 -
 -
- 4. Breve descripción proxecto:**

- 5. Data inicio/fin custos subvencionables:**

- 6. Contía da axuda a fondo perdido:**

- 7. Contía da axuda en especie¹:**

- 8. Outros datos de interese:**

¹ Disposición Adicional Terceira da Lei 9/2007, do 13 de xuño, de subvencións de Galicia.

ANEXO IV

ORZAMENTO DO PROGRAMA ACELERACIÓN TECNOLÓXICA 4.0

	GAIN	CONSORCIO	TOTAL (b.i.)
ACELERACIÓN TECNOLÓXICA (6 meses - 12 meses)	25.900€	11.100€	37.000€
Mentoring Tecnolóxico Avanzado en Tecnoloxías 4.0	10.500€	4.500€	15.000€
Gastos de desenvolvemento de Prototipos e Demostradores polas startups	7.000€	3.000€	10.000€
Outros Gastos relativos á aceleración de 6 meses e acompañamento de 6 meses no CIS Galicia.	8.400€	3.600€	12.000€

Os anteriores importes atenden ao custe que supón a impartición do citado Programa de Aceleración Tecnolóxica, custe que é independente do número de proxectos aos que o dito Programa se imparta, e que se xera única e exclusivamente polo feito da súa impartición.